

四庫全書

史部

欽定四庫全書

史部

文獻通考卷二百九十二

三十五

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣金光悌

謄錄監生臣馮堪

謄錄舉人臣龐兆懋

欽定四庫全書

文獻通考卷二百九十二

鄱陽馬端臨

貴與著

象緯考十五

流星星隕

仁宗乾興元年五月壬午星出危大如杯赤黃色有尾
迹速行而東炸如迸火隨至羽林軍南沒明燭地占曰
北夷兵動九月己丑星出天市垣旁緩行經天過天市

垣至營室沒占曰大臣出使土功起十月丁酉星出右旗如太白西南速行至天弁沒明燭地占曰兵動將軍勝 天聖元年閏九月甲辰常星未見星出營室至外

屏沒占曰主屋室修營事 四年五月辛巳星出天市

垣市樓側東北流入濁占曰有街肆之事 五年九月

丁未星出北辰沒於天床側占曰宮中不安宜審察之

六年四月甲申夜漏欲盡有星大如斗器自北方至

於西南光照地有聲如雷曳尾迹長數丈久之散為蒼

白雲 八年二月丁酉星出軒轅大星側如杯速行至
器府沒占曰憂火災 十年三月癸巳星出中台貫北
河入東井沒炸烈有聲明燭地食頃又有星出天市垣
宗人側東流入濁八月癸亥星出天船近勾陳沒明燭
地乙丑星出胃大如杯有尾迹西北緩行迸為六七小
星相隨於大陵明燭地九月丙子星出婁沒於雲雨側
尾迹久方散食頃又有星出天大將軍近奎沒尾迹久
方散明燭地續又星出北辰西北速行至內階沒又有

星出天苑沒於天園明燭地 景祐元年八月己卯星
出東井行至厠星沒尾迹久方散明燭地占曰井秦地
主有水災沒於厠為兵象九月己丑星出東井如太白
赤黃色有尾迹向東速行至柳沒光照地占曰使出有
火令其夜星出婁至奎沒明燭地占曰有溝瀆之事

二年八月庚申星出大陵如太白赤黃色東南緩行沒
於昴尾迹久方散明燭地占曰四夷有兵 四年六月
壬申星出王良如太白青白色有尾迹東南速行至婁

沒明燭地占曰兵出及倉庫官有憂七月戊申有星數
百皆西南流其最大者一星至東壁沒光燭地久之不
散占曰衆庶流移之象 五年四月壬申有星出中台
如太白青白色有尾迹向北速行入濁明燭地占曰將
相憂又星出天江如太白有尾迹西南速行至房沒占
曰有大水 寶元二年三月癸丑星出右旗赤黃有尾
迹向南速行沒於建星明燭地占曰兵爲亂下有謀

康定元年三月癸丑星出北斗北行入濁明燭地占曰

使出北方 二年九月己酉有星出奎如太白赤黃有尾迹西行沒於東壁明燭地占曰天下文章之士用

慶厯二年三月庚戌星出勾陳側如太白赤黃有尾迹西北緩行至天棓沒明燭地占曰天棓主忿爭刑罰藏兵禦難備非常也今流星入之主爭地七月乙丑星出西北方大如釵西北行文餘沒色赤黃有尾迹明燭地十二月庚申有星出弧矢南行入濁赤黃有尾迹明燭地占曰秦分兵動及土功事起 五年六月星出奎如

太白西行至天倉沒有尾迹明燭地占曰有溝瀆事及
兵起壬戌星出營室如太白赤黃色東南速行過危及
虛有尾明燭地占曰北狄交兵齊分民有災 六年六
月丁巳星出營室大如杯光燭地有聲北行至王良沒
占曰兵出 七年六月己巳星出天田赤黃色有尾迹
西南緩行至折威沒占曰邊將憂九月星出天苑如太
白南行至天園沒有尾迹明燭地占曰牛馬禽獸多死
八年六月己卯星出北斗至郎位沒有尾迹明燭地

占曰兵出八月乙亥星出東壁赤黃色東北速行至濁
沒占曰天下文章之士用 皇祐元年六月己巳星出

匏瓜赤黃有尾迹向南速行至建星沒占曰吳分有謀

二年四月癸未星出氐赤黃色東南速行至心沒有

尾迹明燭地占曰內使出外使來德令宣布國人有喜

四年九月星出紫宮北辰側赤黃色西南速行至貫

索沒尾迹凝天明燭地占曰有赦宥 五年九月乙亥

星出參如太白西北速行至昴沒有尾迹明燭地占曰

兵出以禦邊寇 至和元年七月壬戌星出王良色赤
黃向北速行至天船沒有尾迹明燭地占曰兵涉津梁
三年九月壬午星出東井如太白赤黃色向北速行
至文昌沒占曰秦晉今有水將兵者還 嘉祐二年七
月丁丑星出王良如太白赤黃色西南緩行至亢沒有
尾迹明燭地占曰中官有咎 三年七月乙酉星出北
河如太白赤黃色東南緩行散為數道至狼沒尾迹凝
天占曰北河中外之界狼為盜賊侵掠宜警邊河備兵

革 四年五月癸丑星出營室大如杯赤黃色西南速行至羽林軍沒炸烈有聲占曰軍行炸而有聲者戍兵不安六月辛未星出胃沒於勾陳又有星出天船至王良沒占曰倉廩官災津梁有阻策馬者憂九月己亥星出紫宮勾陳側大如盃東北速行曳尾長五尺初直後曲流至北辰東沒沒後尾迹凝結如盤食頃散占曰流星大者事大曲行者姦事也色赤兵象北行其事在北方今形體異於常而小星十數南北分流衆庶流行之

象宜審察姦謀以備未萌 五年正月辛卯星出畢大
如盃赤黃色速行至天倉沒明燭地尾迹炸烈而散有
聲如雷占曰流星大者事大有聲如雷怒之象出於畢
主邊事兵爭不利入天倉粟以兵出八月庚申星出東
壁東行入濁占曰文學之士有憂 六年八月丁未星
出狼大如杯至天社沒明燭地尾迹凝天良久散占曰
國多盜賊風雨不時 七年十月庚寅星出南河至天
社沒明燭地占曰邊兵不安風雨失序 八年七月乙

丑星數百縱橫西流占曰流星無名衆庶之象皆西流
民勞役

英宗治平元年二月星出紫宮勾陳側西北入濁沒明
燭地尾迹炸烈有聲占曰后妃有憂 二年八月乙未
星出河鼓大如醖色赤黃速行至天市垣內宗星沒占
曰有兵 三年四月癸巳星出房至濁沒明燭地尾迹
炸而散占曰卿相有逐者 四年正月壬子星出亢西
如太白東南急行至氐東沒赤黃有尾迹主國有使清

獄頒恩流於氏主上卿憂四月己酉星出房東如盂口
西南慢行至亢沒赤黃有尾迹明燭地聲如擺旗主有
使出恤民或外國有使來八月星出柳東如太白東急
行入濁赤黃有尾迹主宗廟有喜賢臣任用十一月星
出五車東如杯口西南急流至昴北沒赤黃照地明主
天子遣使恤民五穀成亦主西夷交兵

神宗熙寧元年二月壬戌星出角東大如太白急行至
翼沒赤黃有尾迹主天子發使外國四夷受賜六月庚

申星透雲出天棂西如太白北急行至天市垣西牆沒
赤黃有尾迹主藏兵以備難非常八月癸亥星出壘壁
陣如太白緩行至狗國沒赤黃照地 二年二月星出
平星南急行入濁沒狀如前主有執法正紀綱使出四
月辛酉星出閣道如太白東南速行至東壁沒青白有
尾迹主文章士用天子好道賢臣在位遠國來賓七月
丁卯星出危南西南急行至壘壁陣沒狀如前主天下
安五穀熟土功興十月己卯星透雲出大陵北如太白

西南急行至東壁沒青白有尾主用故臣亦主文章士
為用遠國來賓 三年二月己丑星出太微垣西上將
南如孟西急行入濁沒狀如前明燭地主大臣於楚分
有外事六月壬申星出紫微垣西垣牆北東北慢流至
濁沒狀如前主天子之使言兵事十二月星出外屏西
南速行入濁沒狀如前主人多不安 四年三月星出
天市垣內斗星西北逆行至貫索西沒狀如前主倉庫
盈溢五穀豐六月星出營室西南流至壘壁陣沒狀如

前主天子行禮出賞國樂民安九月甲午星出紫微垣
西牆東北速行入濁沒狀如前主兵或土功之事 五

年七月己丑星出七公南西南急行至天市垣西牆沒
狀如前主五穀豐成倉庫盈溢十月戊寅星出紫微垣
內後宮東如杯北慢行入濁沒主使出外夷亦主地動
六年四月丙子星出貫索如杯慢行至紫微垣牆上
宰沒青白照地明主外國有使入六月辛卯星出營室
北如杯東南急行至壘壁陣沒赤黃有尾迹照地明主

使出言兵八月壬辰星出羽林軍西如杯南緩行入濁
沒青白尾迹分迸照地明主軍出邊鄙亦主軍中不和
七年二月壬申星出天棓北東北緩行至造父沒狀
如前主兵出備邊鄙四月丙戌星出天市垣東北慢行
至候星沒狀如前主萬物貴八月癸未星出羽林軍內
如杯北慢飛至大陵沒赤黃有尾迹主大軍出十月庚
子星出天倉西西南慢流至敗臼沒如杯赤黃尾迹分
裂照地明主藏五穀待邦用亦主歲飢粟出 八年三

月丁酉星出積水東如太白速行至五車東沒赤黃有
尾迹主糴貴九月丙寅星透雲出河鼓北如太白東南
緩行至危沒赤黃主天下民安五穀熟土功興十月乙
未星出弧矢西北如杯東南緩行至濁沒青白有尾迹
照地明主南夷來貢國有賢臣 九年三月甲子星透
雲出天市內宗正西北慢至太微垣五帝座沒狀如前
主執政憂人多死五月丁丑星出尾北東南急行入濁
狀如前主後宮有子孫之喜六月丙午星出東壁北如

杯南急流至羽林軍沒赤黃有尾迹主天子用故臣八月壬寅星出危北西南急流至濁狀如前照地明主天下不安十月丁未星出柳東速行入濁狀如前主宗廟有喜賢臣任用亦主多雨十年正月辛巳星出參西南速行至天苑沒主穀賤牛馬多傷四月甲辰星出郎位北急流至下台南沒狀如前主大臣有咎六月乙巳星出王良東西北急流至紫微垣內勾陳沒狀如前主兵將出十月己亥星出霹靂北西南急行至濁沒狀如

前主陽氣太盛擊辟萬物 元豐元年閏正月甲辰星

出柳北西急行至天廩沒狀如前照地明主穀熟六月
甲辰東南方光燭地有星如盂出匏瓜至內階沒分裂
有聲如雷主兵喪八月甲子星隔雲照地明東北急行
至濁沒主有大使出東北方其方流血十一月丙寅星
出北河北東南急行至弧矢沒狀如前主使出十二月
壬子星出輿鬼東北速行至軒轅沒狀如前主后有喜
三年二月辛丑星出弧矢南東南速行至濁沒狀如

前主西戎有兵賊五月辛未星出中合北東南緩行至
天江沒狀如前主水泛溢民飢十一月丙辰星出厠星
東東南慢流至濁沒狀如前主晉分民疾 四年正月
戊戌星出五車北如杯西南急流至天困沒赤黃尾迹
分裂主外國來貢六月戊寅星出紫微垣內厨南如太
白慢流至大角沒赤黃有尾迹主將出九月己酉星出
天街北急行穿五車沒狀如前主粟麥貴十一月乙未
星出勾陳北東北慢行至濁沒狀如前主後宮有喜

五年四月庚申星出角東南急行至濁沒狀如前主發
使外國七月辛巳星出天市垣內列肆西北急行至濁
沒狀如前主人主憂 六年閏六月丙子星出貫索東
北西南急行至濁沒狀如前主貴女憂九月癸卯星出
五車東北急行至濁沒狀如前主有兵車出 七年四
月辛未星出平星東西南慢行至濁沒狀如前主臣黜
期半年 八年二月庚辰星出太微北左執法北東南
急行入濁沒狀如前主大臣執法者憂七月庚申星出

胃宿急流至天困沒狀如前主外國來降倉庫盈賞大臣及有憂恤事十月庚寅星出昴南急流至濁沒主有赦令恤民

哲宗元祐二年二月丙戌星出上台北向西北急流至王良南沒赤黃有尾迹明燭地主遣使安撫四方搜揚草澤招賢集德七月丁巳星出墳墓東慢流至壁南沒狀如前主大臣有喪十一月戊申星出紫微垣北西北急流至濁沒狀如前主使出二年正月辛巳星出軫

南向南急流至濁沒狀如前主大臣忠諫賢人來國昌
萬物賤九月甲寅星出天市垣中山北西急流至天紀
西沒狀如前主有赦令賞賜 三年三月己酉星出亢
南向南慢行至濁沒狀如前主天子遣使清姦獄頒赦
令六月庚子星出辟南東南急流入羽林軍內沒狀如
前主文章士為用亦為兵起八月癸巳夕有星自中天
向東急流至濁沒狀如前主其下兵戰 四年三月戊
戌星透雲出織女東速行至天津西沒狀如前主布帛

貴亦主大衆九月壬午星透雲出天樁北速行至濁沒
狀如前主修兵備十一月己酉星出司怪西南如杯慢
流至參旗沒赤黃有尾迹主使出其方亦主兵起 五
年正月己丑星出司怪西南行至濁沒狀如前主遣使
七月辛未星出危如太白東南急流至濁沒青白有尾
明燭地主國安民豐及土功興十月己未星出車房急
流北至天津西南沒狀如前主兵軍動大衆行及主河
事 六年二月辛丑星出翼東南急流至濁沒狀如前

主國人皆受恩賜七月癸亥透雲星二皆如太白一出
天槍東南急流至亢東沒一出奎東西南急流至壘壁
陣東沒赤黃有尾迹主有兵起侯王受賜十月丁卯星
出王良南東南急流至濁沒狀如前主多風雨亦主遣
將 七年二月戊午星出敗爪東南急流至虛東沒狀
如前主遣使或冢宰憂四月甲子透雲星出天市垣燕
星南急流至濁沒狀如前主倉庫盈溢五穀豐登八月
辛未星出奎距星西南急流至濁沒狀如前主天下安

寧遠人來貢 八年正月甲申星出天市垣內候南東
南急流至濁沒狀如前主民流十月戊申星出天棓東
南北流至濁沒狀如前主有赦及宥大臣罪 紹聖元
年二月丙午透雲星出辟東慢流入濁狀如前主天下
文章士登用賢臣在位遠國來賓六月星出人星南急
流至牛沒狀如前主牛馬昌盛關梁入貢十月甲申星
出天槍南慢行至上台沒狀如前主賑貸亦主兵及大
將憂 二年三月丙辰星出天津東北向東慢流至室

北沒狀如前主使出及外國使至五月甲寅星出閣道
北東北急行至濁沒狀如前主風雨十月庚寅透雲星
出張南東南急流至濁沒狀如前主天子社稷昌 三
年二月丙子透雲星出太微垣慢流至濁沒狀如前主
使出五月己未星出平星西如杯大急流至濁沒青白
有尾迹明燭地主臣有黜者 四年六月甲申星出亢
西南向西急流至濁沒狀如前主使出清犴獄頒恩赦
九月乙卯星出天囷東之南急流入濁沒主帝王布德

令外國貢異寶及賞賚大臣又主市有火災十二月丁
未星出天槍西南急流至濁沒狀如前主大兵起斧鉞
用亦主賑貸及遠方賢人至 元符元年三月甲戌星
出天乳北急流至大角沒狀如前主禮義教興遣使及
隣國使入貢六月星出室如杯至壁東沒青白有尾迹
主軍糧豐五穀成文士入賢人用 二年二月癸卯星
出靈臺北向西慢行至軒轅沒狀如前主賢臣在位天
子有子孫之喜十月辛丑星出女西北急流至牛西北

沒狀如前主五穀貴有水災

容齋洪氏隨筆曰國朝星官厯翁之伎殊媿漢唐
故其占測荒茫幾於可笑偶讀四朝史天文志云
元祐八年十月戊申星出東壁西慢流至羽林軍
沒主擢用文士賢臣在位紹聖元年二月丙午星
出壁室東沒主文士入國賢臣用二年二月癸卯
星出靈臺北行至軒轅沒主賢臣在位天子有子
孫之喜按是時宣仁上仙國是大變一時正臣以

次竄斥章子厚在相位蔡卞輔之所謂四星之占
豈不可笑也子孫之說蓋諂劉后云

按容齋言星厯之學無傳故其占不驗然愚嘗考
之五緯行天其常也流星飛星之變非常也故前
史所書或數年一見或間歲一見其甚者則一歲
頻見今宋史所書則無月無之而四朝志尤甚至
有一月而四五見或同日而數流者今姑掎摭其
畧每季僅一書而猶覺繁夥夫其紀載之冗雜如

此則其占驗之茫昧固宜矣

徽宗建中靖國元年正月星出西南如盂東北急流入
尾距星沒青黑無尾迹明燭地主舊來歸后族進祿亦
曰風雨時稼穡成 崇寧元年三月星出張如金星西
南急流至濁沒狀如前主諸侯受賜天子宗廟社稷昌
十月壬子星出天船如盂急流至五車沒青黑有尾迹
聲隆隆然主大水或曰水旱不時 二年正月戊申星
出水位如金星急流至北河沒狀如前主大水六月戊

午星出亢西南急流入濁沒狀如前主天子遣使清獄
頒恩九月辛巳星出牛西南慢流至狗國沒狀如前主
民流亡十二月丁未星出大陵如金星至騰蛇沒狀如
前主其下有積尸一曰水旱兵喪 三年四月戊申星
出軫西北慢流入太微垣內屏星沒狀如前主外國有
急使期不出一年十二月甲子星出天大將軍西北急
流入王良沒狀如前主大兵將出 四年正月甲申星
出角如盂西南慢流入濁沒青白無尾迹主天子發使

外國五月庚申星出河鼓西北急流入濁沒狀如前主
諸侯作亂一曰兵起十二月甲午星出參如杯東南慢
流入軍市沒狀如前主大將出一曰有赦又云饑 五
年六月庚午星出西東北急流入天市垣內沒狀如前
主王者有憂一曰閹臣出六月乙酉星出庫樓向西急
流入濁沒狀如前主鄭分受兵九月癸卯星出天船慢
流至諸王沒狀如前主水旱不時十二月壬戌星出奎
向南急流入天倉沒青白有尾迹及三文明燭地聲散

如裂帛主天子用文偃武一曰歲熟 大觀元年二月
丁卯星出參如杯西南急流入濁沒狀如前主天子遣
使安邊一曰米賤有赦 二年十二月癸卯流星出奎
如盂西北急流入造父沒青白有尾迹照地明有聲主
有溝瀆事 政和元年四月丙辰星出亢如盂西北急
流至右攝提沒赤黃有尾迹照地明主兵來入計於王
庭五月辛巳日未中星隕東南主下有兵流血 二年
九月乙卯星出斗如杯西南急流入濁沒赤黃有尾迹

照地明主大臣死

四年九月庚子星出危墳墓如孟

東南急流入羽林沒青白有尾迹照地明主人民安土

功興一曰有喪諸侯憂 七年十二月甲子星出胃東

南如孟西北急流至天大將軍沒赤黃有尾迹照地明

主天子以金玉賞大臣外國有來降者一曰趙分五穀

熟 八年九月庚辰星出斗魁南如孟東南急流至天

淵沒赤黃有尾迹照地明主不出其年兵起一曰大臣

死江河溢 宣和元年三月丁卯星出柳如孟東北急

流入太微垣赤黃有尾迹照地明主多雨水一曰周分
憂兵起外國或有急使十月戊子星出雲雨如孟西南
慢流入羽林軍內沒青白照地明主后憂疾大風雨

二年十二月辛巳星出奎西南如杯西南慢流至壁沒
赤黃有尾迹照地明主其下破軍殺將一曰天子好道
用故臣 四年十一月丙寅星出王良北如杯急流至
紫微垣內上輔北沒赤黃有尾迹照地明主匈奴兵起
天下大亂上輔人君惡之 五年二月丙午星出北河

東北如杯東南慢流至軫沒赤黃有尾迹照地明主天下有難 六年七月丁酉星出大陽守如孟東北急流入濁沒赤黃有尾迹照地明主將相憂兵革興 七年十月戊子星出王良北如杯急流入紫微垣上輔北赤黃有尾迹照地明主大兵將起天下大亂人君惡之

欽宗靖康元年二月丙辰星出張如金星東南急流至濁沒青白有尾迹照地明主有赦令三月壬辰星出紫微垣內勾陳東南如金星東北慢流至濁沒赤黃有尾

迹照地明主兵起土功興一曰人君惡后妃憂六月癸
丑星流大如五斗器衆光隨之明照地起東南墜西北
有聲如雷庚申星出紫微垣內華蓋東南如金星向北
急流至左樞沒主發使有赦人君惡之二年正月乙
未大星出建向西南急流至濁沒赤黃有尾迹照地明
主吳秦有兵

高宗建炎四年十月辛未流星出壁占文章士用自是
范冲等召 紹興元年三月甲戌流星出東方晝隕占

其下有急兵破軍殺將其地流血七月乙未朔流星出河鼓占兵出十一月丁巳流星出天槍北占兵大起斧鉞用於是命韓世忠提兵入建州討范汝為平之明年岳飛大破曹成二年三月甲午流星出紫微垣華蓋西南占主内使出戊午流星出自權星西南照地明占有使來論兵事未幾王倫自金還乃遣潘致堯等使金金人遣李永壽等來議事四月乙巳流星出太微垣西右執法星北占主大臣有外事出天庭之門天子使也

次月呂頤浩出師 六年十月流星出壁西北占天下
文章士與賢士並用於是胡安國尹焞召 七年八月
有星隕於汴京是年金人廢偽齊 八年十一月乙巳
流星出天囷東北占有賑發事於是以米二萬石付岳
飛賑京西湖北饑民又以錢五十萬付吳玠犒軍 二
十六年六月乙亥流星出東北方照地明占流星晝隕
其北大戰流血千里分屬燕野在幽 二十八年六月
癸巳有星從西北離地約高一丈至西北沒 三十一

年六月甲子飛星出氐宿入角宿赤黃色初小後大有
小星相隨占為兵八月壬午流星約長三丈晝隕占營
頭也若晝見橫天明者臣下圖議誅罰善良

孝宗隆興元年七月丙申流星出天市垣內向西北慢
流至右攝提西沒臨沒時炸散小星二十餘顆赤色有
音聲有尾迹占天子欲有赦賜事庫倉盈溢五穀豐君
喜入右攝提星則有外兵事來入計王庭炸散有聲皆
為怒氣天下不安急使馳驛色赤為兵旱火八月庚申

流星出羽林軍向東南急流至濁沒九月庚戌流星出
紫微外垣座鉤星向西北急流抵紫微垣內座尚書沒
十一月丁未飛星出天船星急流向紫微垣外座內厨
西北沒炸出二小星青白色 二年二月辛酉飛星出
權星慢流至太微垣內五帝座大星西南沒青白色微
有尾大如木星占兵起外國當有急使為大人憂 三
年九月戊戌大角搖動十一月壬午朔流星晝隕占臣
下圖議誅罰忠良癸未夜流星出犯弧矢急流至天廟

東南沒大如金星十二月壬午亦如之占邊兵起屠城
殺將 乾道四年八月丙辰流星如蛇出自十二諸侯
國代哭之間至師門之下沒占哭泣之象 五年九月
丙辰流星如蛇入天棓占流星如蛇行者姦事也大而
光者其人貴且衆也入天棓星為天子之先驅分爭及
刑罰 六年九月辛巳有星出狼星穿入弧矢星至濁
沒如土星大赤黃色有尾迹後化為紫細白雲九刻乃
散占邊兵起當有屠城殺將尾迹化為白雲其名大渭

流血積骨縵縵如秦野在雍強敵將亡之兆 七年七月戊戌東北方蒼黑雲間有透雲流星如拳大急向西北方至濁沒狀如前占大使也凡流星暉然有光白長竟天曰人主之星相從三軍於是次年春遣虞允文出蜀治兵事九月甲午西南方流星急流至濁沒狀如前主兵刑民饑 淳熙七年五月乙亥流星出天市垣東海慢流炸作三小星青白色尾迹照地如盞口占青為憂饑白為兵 十一年四月乙丑流星透雲出自中天

慢流向東北方沒有尾迹後炸作散小星從青白色有音聲大如金星是為流星夕墜者占下有兵疫炸散有聲怒之象 十三年九月辛亥流星大如金星其色先赤後黃白尾約二尺委曲如蛇行有類枉矢占為以亂伐亂又云枉矢臣不忠不良天下恐又云政暴虐枉矢如蛇行姦事

寧宗慶元二年九月甲午流星晝隕 四年六月甲午亦如之七月壬寅流星如椀大出羽林軍之下青白色

占為憂為兵 嘉泰二年四月辛巳流星晝隕占赤色
為兵旱是歲大旱 四年十一月庚午流星出天津急
流天市垣占火災民疾 開禧元年十二月庚子流星
赤色及金色星大出中天向濁沒占為兵旱火 二年
六月癸丑流星出招搖入庫樓色占同上 六年五月
癸亥流星晝隕占其地大戰覆軍流血千里九月癸卯
流星夕隕占其下兵疫色赤為兵旱丁巳流星晝隕於
是金國亂十月戊戌流星出自昴宿西南慢向天廩東

南沒占兵起他國使來有赦令入天廩色赤為旱火黃則大熟 七年四月壬午流星出自軫宿距星東南慢流至濁沒有使出辛卯流星出自天津西南慢向心宿西北沒占如前是秋金人使來索歲幣 十六年十一月壬戌流星怒聲如雷

文獻通考卷二百九十二

欽定四庫全書

文獻通考卷二百九十三上

鄱陽馬端臨貴與著

象緯考十六上

星晝見

漢安帝永初二年正月戊子太白晝見占為強臣

前志曰太

白晝見強國弱小國強女主昌

時鄧氏方盛

五年六月辛丑太白晝

見經天

春秋漢舍孽曰陽弱辰逆太白經天註云陽弱君柔不堪鉤命決曰天失仁太白經天

元初四年正月乙未太白晝見丙上

以下書日書見者皆太白晝見也

順帝永建二年二月癸未太白晝見三十九日閏月乙

酉見東南維四十一日五年閏月庚子六年十月

乙卯永和二年五月戊申三年二月辛巳戊子在

熒惑西南光芒相犯三月壬子六月丙午八月乙卯俱

太白晝見太白者將軍之官又為西州晝見陰盛與君

爭明熒惑與太白相犯為兵喪是時大將軍梁商父子

秉勢故太白常晝見也漢安二年正月己亥太白晝

見七月甲申見韓揚占曰天下有喪一曰有白衣之會
明年八月順帝崩 又明年冲帝崩

孝桓元嘉元年二月戊午太白晝見 永興二年閏月
丁酉見時上幸後宮采女鄧猛後四年梁后崩梁冀誅
猛立為后恩寵甚盛 永壽元年九月己酉晝有流星
長二尺其色黃白 延熹九年七月太白晝見經天為
兵憂在太人後一年桓帝崩太傅陳蕃大將軍竇武等
謀誅宦官不克皆枉死

魏文帝黃初四年六月甲申太白晝見按劉向五紀論
曰太白少陰弱不得專行故以己未為界不得經天而
行經天則為晝見其占為兵喪為不臣為更王強國弱
小國強是時孫權受魏爵號而稱兵距守 五年十月
乙卯見占同上 六年十一月丙寅見南斗遂歷八十
餘日恒見占曰吳有兵明年孫權遣張彌等將兵萬人
錫公孫淵為燕王淵斬彌等虜其衆

明帝青龍三年五月丁亥見積三十餘日以晷度推之

非秦魏則楚時諸葛亮據渭南宣帝與相持孫權寇合肥入淮沔天子親東征蜀本秦地則為秦魏楚兵悉起矣 四年三月己巳太白與月俱加景晝見月犯太白占同上 景初元年十月壬申見在尾厯二百餘日恒晝見占曰尾為燕有兵時公孫淵自立為燕王置百官發兵距守宣帝討滅之

晉惠帝元康六年十月乙未太白晝見 永康元年見占曰為不臣是月賈后殺太子趙王倫廢殺后及張華

明年倫篡位 永寧元年自正月至於閏月五星互經
天縱橫無常傳曰日陽君道也星陰臣道也日出則星
亡臣不得專也晝而星見午上者為經天其占為不臣
為更王今五星悉經天天變所未有也石氏說曰辰星
晝見其國不亡則大亂是後台鼎方伯互執大權二帝
流亡遂至六夷更王迭據華夏亦載籍所未有也其四
月歲星晝見五月太白晝見占同前 二年四月癸酉
歲星晝見占曰為臣強時齊王罔定京都因留輔政專

憐無君成都河間長沙王討之問兵敗夷滅

成帝咸康四年四月己巳太白晝見在柳占為兵為不
臣明年石虎大寇沔南内外戒嚴

穆帝永和十年七月庚午太白晝見晷度推之灾在秦
鄭時桓溫伐苻堅破其峽柳軍十二月慕容恪攻齊

十二年六月庚子見在東井占如上 升平四年十二
月庚辰見

哀帝興寧元年十月太白晝見在亢占亢為朝廷有兵

喪為臣強時桓溫方擅兵明年庾后崩

簡文咸安二年太白晝見在七星

孝武寧康二年十二月甲申太白晝見在氐氐兗州分

野 太元元年八月癸酉見在氐 二年九月壬午見

在角 六年九月丙子見 七年十一月太白又晝見

在斗占曰吳有兵喪 八年四月甲子又晝見在參占

曰魏有兵喪是月桓冲征沔漢楊亮伐蜀並拔城畧地

八月苻堅自將百萬入寇攻沒壽陽劉牢之謝元等破

之堅衆大潰至九年六月太后褚氏崩八月謝元出屯
彭城經略中州 九年七月庚戌見十一月丁巳又見
十年四月乙亥書見於畢昴占曰魏國有兵喪是時
苻堅大衆奔潰趙魏兵連相攻堅為姚萇所殺 十一
年三月戊申見在東井占曰秦有兵臣強六月甲申又
見於輿鬼占曰秦有兵時魏姚萇苻登連兵相征不息
甲午歲星書見在胃占曰魯有兵臣強十二年慕容垂
寇東阿翟遼寇河上姚萇假號安定苻登自立隴上呂

光竊據涼土 十二年六月癸卯見在柳十月庚午見
在斗 十三年正月庚戌又畫見 十四年四月己巳
太白畫見於柳六月辛卯又畫見於翼九月庚寅又畫
見於軫 十六年四月癸卯朔見 十七年七月丁丑
見十月丁酉又畫見 十八年六月又畫見 十九年
五月又畫見於柳六月辛酉又畫見於輿鬼九月又見
於軫 二十年七月丁亥見在太微占曰太白入太微
國有憂畫見亢為兵喪 二十一年二月壬申太白畫

見三月癸卯太白連晝在羽林占曰有強臣有兵喪中
軍兵起三月太白晝見於胃占曰中軍兵起

安帝隆安元年四月丁丑太白晝見在東井占曰秦有
兵喪六月姚興攻洛陽郗恢遣兵救之冬萇死子泓代
立二年六月戊辰攝提移度失常歲星晝見在胃究
州分野是年郗恢遣兵伐慕容寶於滑臺敗而還閏月
太白晝見在羽林十一月犯東上相五年正月太白
晝見自去年十二月在斗晝見至是月元興元年三

月戊子太白犯五諸侯因晝見占曰諸侯有誅 義熙
元年七月庚辰見在翼軫占曰為臣強荊州有兵喪
三年正月丙子見在奎五月己丑見在參占曰益州有
兵喪臣強 六年六月甲午見七月太白犯少微而晝
見 七年六月見在翼 九年五月壬辰太白犯右執
法晝見

恭帝元熙元年七月己卯太白晝見自義熙元年至是
太白經天者九革代更王臣失君之象也

宋文帝元嘉五年十一月日食星晝見

梁武帝天監四年六月壬戌歲星晝見占曰歲色黃潤
立竿影見大熟是歲大穰米斛三十又曰星與日爭光
武且弱文且強自此後帝崇尚文儒躬自講說終於太
清不修武備 普通四年十一月太白晝見 六年五
月己酉太白晝見六月癸未太白經天 太清三年太
白晝見占曰有大喪天下革政更王強國弱小國強其
年帝為侯景所幽崩

陳廢帝光大二年九月戊午太白晝見占曰太白晝見國更政易王其年十二月帝廢為臨海王

周武帝天和元年十月乙卯太白晝見經天

隋文帝開皇元年三月甲申太白晝見占曰為臣強為革政四月壬午歲星晝見占曰大臣強有逆謀王者不安其後劉昉等謀反伏誅二十年十月太白晝見占曰大臣強為革政易王右僕射楊素熒惑高祖廢太子勇明年改元皆陽失位及革政易王之驗也

唐高祖武德元年五月庚午太白晝見占曰兵起臣強
二年九月庚寅見 九年五月見六月丁巳經天已
未又經天在秦分巳卯見七月辛亥晝見甲寅晝見八
月丁巳晝見太白上公經天者陰乘陽也

太宗貞觀二十二年七月太白晝見

高宗永徽元年五月己未太白晝見十二月乙未見

四年六月己丑見 龍朔元年六月辛巳太白晝見經

天 永隆元年五月丁酉太白晝見經天是為陰乘陽

陽君道也

中宗景龍三年六月癸巳太白晝見在東井京師分野
元宗開元十四年十月甲寅太白晝見

肅宗至德二載七月己酉太白晝見經天至於十一月
戊午不見歷秦周楚鄭宋燕之分

代宗永泰元年九月辛卯太白晝見經天 大歷八年
八月己丑太白入太微晝見占曰兵入天廷 十一年
閏八月丁酉太白晝見經天

憲宗元和九年七月太白入南斗至十月出乃晝見

穆宗長慶元年三月庚戌太白犯五車因晝見至於七月以歷度推之在唐及趙魏之分占曰兵起二年九月太白晝見四年三月庚午太白犯東井北轅遂入井中晝見經天七日而出因犯輿鬼京師分也六月己丑太白犯軒轅右角因晝見至於九月占曰相凶

文宗太和六年四月己丑太白晝見九年夏見自軒轅至於翼軫開成二年六月己酉見

僖宗乾符二年四月庚辰太白晝見在昴 三年七月
常星晝見

昭宗光化三年十一月丁未太白犯月因晝見 天復
元年五月自丁酉至於己亥太白晝見經天在井度
後唐莊宗同光三年六月甲子太白晝見己巳見

明宗天成元年七月庚申太白晝見 長興二年五月
癸亥見閏五月己巳歲晝見八月戊子太白晝見十月
壬辰太白晝見 四年五月癸卯太白晝見

末帝清泰元年五月己未太白晝見

漢高祖天福十二年四月丙子太白晝見

隱帝乾祐二年四月壬午太白晝見

周太祖廣順二年太白經天

宋太宗太平興國八年三月丙寅有星晝出西南當未
地青白尾迹二丈餘沒於東南有光明占曰未地有兵
是年西戎入寇宥州擊敗之 淳化元年七月辛卯太
白在角西南一尺許司天言據躔次當行中道南垂左

角主有謀不成按書太白形最大星中無比去太陽四十五度內晝見則占臣今占候太白晝見蓋去日極遠自然之理也

真宗咸平三年六月太白晝見占曰為兵喪 四年丙寅太白晝見在南斗 五年三月丙午有星晝出心至南斗没赤光丈餘九月丁未有星晝出紫微垣如半升器貫北斗没 六年六月庚午有星晝出東方色黃白有尾迹占曰兵偃民樂之象甲午太白晝見八月庚午

太白晝見 景德元年六月戊午有星晝出西南方赤
黃有尾迹速流丈餘沒十一月太白晝見占曰秦有兵
二年四月甲辰太白晝見 三年七月乙巳太白晝
見庚辰又晝見十二月太白晝見 四年三月庚申有
星晝見出南方 大中祥符元年七月庚申太白晝見
八月己丑有星晝出中天如太白有尾迹急流東南近
日沒 二年五月乙亥有星晝出東方如太白尾迹赤
黃流至日北沒占曰蠻夷起兵其年黎州蠻擾 四年

六月丙午太白晝見八月乙巳太白晝見 六年五月
乙巳有星晝出南方赤光迸逸若五升器照地明壬午
太白晝見 七年七月癸卯太白晝見十一月癸未
有星晝出日西南大如盃尾迹二丈餘濶三寸許青白色
西流而沒占曰為旱火明年榮王宮火 九年五月庚
午太白晝見 天禧三年六月辛卯太白晝見占曰女
主昌八月辛卯又晝見 四年七月丁巳太白晝見
五年八月丙午太白晝見

仁宗天聖元年十一月壬辰太白晝見占曰有兵兵罷
無兵兵起不利先舉 天聖二年六月丁卯晝漏上星
出中天赤黃色有尾迹西南緩行入濁占曰大使以兵
事出其方行緩事遲 三年六月壬戌太白晝見十二
月戊寅見 五年五月壬寅見 明道元年七月見三
十日 慶厯三年八月甲寅見 皇祐三年四月丙午
見 至和元年五月壬辰見九月己丑見十月辛卯見
三年四月己丑見占曰太白少陰晝見於丙其占爲

兵為不臣 嘉祐二年六月己未見占如上九月戊戌
晝漏上中天有星出狼大如杯東南速行至濁没尾迹
青白占曰流星大者使大令晝而星流主大使出狼星
有盜賊侵掠之事 四年正月庚戌太白晝見占曰太

白少陰弱不得專行故以己未為界不得經天而行經
天則晝見其占為兵喪為不臣強國弱小國強以日宿
推之屬秦魯分宜於其地謹備兵寇以應天象七月辛
丑見占曰西戎秦地防邊事十月乙丑晝漏上星出天

將軍西南行至濁沒色青白尾迹凝天良久散 五年

三月乙未歲星晝見占曰為臣強為兵寇今推考歲星
在女度屬青齊分宜於其地嚴設警備九月庚寅太白
晝見 六年六月乙丑太白星晝見壬申歲星晝見占

曰日者陽君道也星者陰臣道也日出則星亡臣不得
專也今晝而星見其占為不臣及兵賊事以分野占之
在衛分十一月癸丑晝星出東北維去地五丈許大如
盃向東北緩行入濁尾迹青白占曰流星晝出大臣災

色青白為兵憂又主陰謀事以分野日辰推之在魯衛
分及北狄鴈門 七年五月戊午太白見占皆同四年
七月事六月丙子歲星見占曰臣有不忠者七月己酉
太白經天復見占曰兵喪民災臣不順命不救則四夷
大動蠻貊來侵十月乙未見占曰為不臣為兵喪 八
年七月癸亥歲星書見占曰臣強屬趙翼分

英宗治平元年正月戊戌太白晝見占同嘉祐七年十
月六月辛酉見占曰秦分兵喪壬戌歲星見占曰臣強

二年六月己丑晝有星出中天大如盃西速行至濁
沒尾迹赤黃占曰流星晝見明大民災兵革動速行入
濁其下陰謀相奪七月庚申晝漏未上星出紫宮西行
曳尾長二丈沒尾迹青白占曰有使出西方言兵事丁
丑太白見占曰為兵喪為不臣十二月辛亥見占如上
神宗治平四年二月丁酉太白晝見主為兵為大臣大
國弱小國強閏三月癸未見主兵凶五月辛巳見七月
癸卯見八月丁未見皆主有兵兵罷無兵兵起或大臣

有咎 熙寧元年十一月癸酉見占太白少陰弱晝見
於午為兵喪為不臣 二年六月壬戌見主秦分兵喪
三年五月癸巳見九月壬子皆見主為兵為占同五
月丙午見 八年三月戊午見七月戊寅見皆主兵
九年十月乙酉見 十年五月甲戌見 元豐元年四
月癸亥見主秦分兵或喪 三年七月戊子見占同
四年七月己丑見 六年八月己卯見 七年十一月
乙卯見主為兵為不臣

哲宗元祐元年六月庚戌見主無兵兵起有兵兵罷十
月庚寅見主秦地彊 三年二月辛丑見七月辛未見
主秦分兵動 六年四月壬寅見閏八月乙丑見 七
年十一月辛巳見 八年四月己未見 紹聖元年正
月壬午晝星出中天如太白西南急流入濁沒赤黃主
兵五月己酉太白晝見六月丁丑晝有飛星出東南如
太白西北急流至中天沒青白有尾迹明燭地主國有
喜九月庚申太白晝見 二年十一月丙申見主兵起

三年五月壬子見 四年三月己未晝星出東南丙
位如太白西南急流至未位没赤黃有尾迹主秦分有
兵及大疫六月己酉太白晝見 元符二年五月甲辰
見主秦地有兵八月癸巳太白歲晝見主天下偃武罷
兵天子崇尚文學任用賢能

徽宗崇寧元年六月己酉見 三年正月癸卯見 大
觀二年十一月丁未見 四年十月戊戌見 政和三
年十二月辛酉見 四年十月乙丑見 五年三月辛

未見 八年十月己卯見 宣和二年六月丁丑見

六年十一月丙子見皆為大國弱小國強女后昌

高宗建炎元年十月甲戌太白晝見 紹興元年四月

壬申太白晝見占為兵喪是月隆祐太后崩諸路兵盜未息 四年五月庚子太白晝見經天於是金人及偽

齊合兵入寇韓世忠敗之於大儀鎮十一月戊申太白晝見經天於是始下詔聲劉豫罪致討金人入光州陷滁州諸將退保逾月虜始退師 六年正月壬辰太白

畫見經天於是諸將進攻劉豫豫以金人之師入寇諸將擊破之十七年五月辛丑太白晝見占為兵喪為不臣大臣行毒不出三年於是秦檜酖殺牛皐二十年六月壬辰太白晝見時虜亮再營汴將徙都舉兵南寇

孝宗隆興元年七月丙申太白經天晝見二年六月戊辰七月庚子俱太白晝見乾道元年三月甲寅乙亥太白俱晝見經天二年二月庚子流星晝見四月

甲申五月甲寅九月庚午太白俱晝見占不出三年有大喪 三年九月戊子太白晝見 四年五月六月辛卯太白俱晝見 五年六月庚寅太白晝見十一月甲子五星晝見 淳熙三年五月癸酉太白經天晝見 四年十一月壬戌太白晝見 六年七月乙丑癸未太白俱經天晝見 九年六月庚申甲子九月癸巳太白俱晝見 十一年五月乙卯太白晝見 十二年六月戊寅七月丁酉太白晝見至八月壬申乃伏 十四年

六月辛卯七月辛丑太白俱晝見

光宗紹熙元年五月丙子太白晝見 四年六月丙寅

十一月甲戌俱太白晝見

寧宗慶元元年三月庚寅七月己亥太白俱晝見 四

年九月壬寅癸卯太白俱晝見 嘉泰元年六月丙午

十一月己巳十二月己卯太白俱晝見占為兵喪為不

臣為秦強 三年六月癸亥太白經天晝見 開禧元

年三月庚申太白晝見 二年五月壬寅太白晝見

三年十二月乙巳太白晝見金人陷隨州 嘉定元年
五月甲子太白晝見時江西黑風峒為亂 四年七月
壬戌太白晝見於是攻金人甚急 五年九月丙午太
白晝見 六年二月丁丑太白晝見於是金國亂十二
月壬辰流星晝隕 七年五月丁丑八月乙巳太白晝
見是歲金人遷都於汴 九年五月癸酉太白晝見明
年金人入寇 十年六月乙丑癸酉十一月戊戌太白
俱晝見於是下詔北伐金人寇四川山東李全來歸

十三年二月庚子三月丁亥六月辛未辛卯太白俱晝
見經天於是金人犯淮蜀九月甲午太白晝見 十四
年三月甲午太白晝見 十五年五月庚戌九月辛未
太白俱晝見 十七年六月丁卯太白晝見

文獻通考卷二百九十三上

欽定四庫全書

文獻通考卷二百九十三下

鄱陽馬端臨貴與著

象緯考十六下

五星聚舍

周將伐殷五星聚房

齊桓公將伯五星聚箕

漢高帝元年十月五星聚於東井以歷推之從歲星也

李奇曰歲星得其正度其四星隨比常正行
故曰從也孟康曰歲星先至先至為主也客謂張耳

曰東井秦地漢王入秦五星從歲星聚當以義取天下
魏崔浩集諸歷家考校漢元以來日月薄食五星行
度并譏前史之失別為魏歷以示高允允曰漢元年
十月五星聚東井此乃歷術之淺事今議漢史而不
覺此謬恐後人之譏今猶今之譏古也浩曰所謬云
何允曰按星傳太白辰星常附日而行十月日在尾
箕昏沒於申南而東井方出寅北二星何得背日而

行是史官欲神其事不復推之於理也浩曰天文欲
為變者何所不可邪允曰此不可以空言爭也宜更
審之坐者咸怪之唯東宮少傅游雅曰高君精於歷
數當不虛也後歲餘浩謂允曰先論本不經心及更
考究果如君言五星乃以前三月聚東井非十月也
衆乃歎服

孝文後六年四月乙巳水木火三合於東井占曰內外
有兵興喪改立王公東井秦分也是歲誅反者周殷長

安市其七年六月文帝崩其十一月戊戌土水合於危
占曰為雍沮所當之國不可舉事用兵必受其殃一曰
將覆軍危齊也

孝景元年正月癸酉金水合於娵女占曰為變謀為兵
憂娵女粵也又為齊其七月乙丑金木水三合於張占
曰内外有兵與喪改立王公張周地今之河南又為楚
其二年七月丙子火與水晨出東方因守斗占曰其
國絕祀至其十二月水火合於斗占曰為淬不可舉事

用兵必受其殃一曰為北軍用兵舉事大敗斗吳分也
又為粵是歲立六皇子為王王淮陽汝南河間臨江長
沙廣川其三年七國反漢遣大將軍周亞夫討平之吳
王亡走粵粵攻而殺之齊趙諸國兵皆敗 中三年正
月丁亥金木合於觜觿為白衣之會其五月甲午金木
俱在東井戊戌金去木留守之二十日占曰傷成於戌
木為諸侯誅將行於諸侯也十一月庚午夕金火合於
虛相去一寸占曰為鑠為喪虛齊也 四年四月丙申

金木合於東井占曰為白衣之會井秦也 其五年四月乙巳水火合於參占曰國不吉參梁也其六年四月梁孝王死五月城陽王濟陰王死六月成陽公主死出入三月天子四衣白臨邸第 後元年五月壬午火金合於輿鬼之東北不至柳出輿鬼北可五寸占曰為鑠有喪輿鬼秦也丙戌地大動鈴鈴然民大疫死棺貴至秋止

後漢章帝建初五年二月戊辰木火俱在參五月戊寅

木水在東井黃帝星經曰木守東井有土功之事一曰大水郝萌曰歲星守參后當之熒惑守大人當之

和帝永元二年正月乙卯金木俱在奎丙寅水又在奎巫咸曰辰守奎多水火災亦為旱古今注曰土在東井奎主武庫兵三星會又為

兵喪辛未水金木在婁亦為兵又為匿謀郝萌曰辰守婁有兵兵罷

無兵兵起巫咸石氏云多火災古今注丙寅水在奎土在東井金在婁木火在昴五年四月

癸巳太白熒惑辰星俱在東井黃帝星經曰五星及客星守井皆為水石氏曰為

旱又曰太白入東井留一日以上乃占大臣當之期三月若一年遠五年東井秦地為法三

星合内外有兵又為法令及水其六年七月水大漂沒

人民傷五穀九月遣兵征叛胡 七年二月癸酉金火

俱在參

巫咸占曰熒惑守參多火災海中占曰為旱戊太白守參國有反臣郝萌曰有攻戰伐國也

寅金火俱在東井

郝萌曰熒惑守井百川皆滿太白又從舍蓋二十日流國又曰雜糴貴又

將相

八月甲寅水土金俱在軫

春秋緯曰五星有入軫者皆為兵大起巫咸占

曰五星入軫者司其出入而數之期二十日皆為兵發

司始入處之率一日期十日軍罷石氏星經曰辰星守軫歲水郝萌曰鎮星出入留舍軫六十日不下必有大

喪春秋緯曰太白入軫兵大起郝萌曰太白守軫必有

死十一月甲戌金火俱在心

維書曰太白守心後九年大饑十二月己

卯有流星起文昌入紫宮消丙辰火金水俱在斗流星
入紫宮金火在心皆為大喪三星合軫為白衣之會金
火俱在參東井皆為外兵有死將三星俱在斗有戮將
若有死相八年四月樂成王黨七月樂成王宗皆薨將
兵長史吳琴坐事徵下獄誅 元興元年閏七月辛亥
金水俱在氐

孝殤帝延平元年正月丁酉金火在婁金火合為爍為
大人憂是歲八月帝崩

孝靈光和三十年十月歲星熒惑太白三合於虛相去各五六寸如連珠占曰火木金三合為喪至中平六年宮車晏駕虛齊地明年瑯琊王據薨

孝獻建安十八年秋歲星鎮星熒惑俱入太微逆行留守帝坐百餘日占曰歲星入太微人主改

魏明帝太和四年十一月壬戌太白犯歲星占曰有大兵五年三月諸葛亮以大衆寇天水宣帝為大將軍拒退之 青龍二年二月己未太白犯熒惑占曰大兵起

有大戰是年四月諸葛亮據渭南吳亦起兵應之魏東
西奔命

晉惠帝元康三年鎮星歲星太白三星聚於畢昴占曰
為兵喪畢昴趙地也後賈后陷殺太子趙王廢后又殺
之斬張華裴頠遂篡位廢帝為太上皇天下從此構亂
連禍 永寧二年十一月熒惑太白鬪於虛危占曰大
兵起破軍殺將虛危又齊分也十二月熒惑襲太白於
營室占曰天下兵起亡君之戒一曰易相初齊王問之

京都因留輔政遂專傲無君是月成都河間檄長沙王
又討之問又交戰攻焚宮闕問兵敗夷滅又殺其兄上
軍將軍實以下二千餘人泰安二年成都又攻長沙於
是公私饑困百姓力屈 泰安三年正月熒惑犯歲星
占曰有戰七月左衛將軍陳眎奉帝伐成都六軍敗績
光熙元年九月鎮星犯歲星占曰鎮與歲合為內亂
是時司馬越專權終以無禮破滅內亂之應也十二月
癸未太白犯鎮星占曰為內兵有大戰是後河間王為

東海王越所殺明年正月東海王越殺諸葛玫等五月
汲桑破馮嵩殺東燕王八月荀晞大破汲桑

懷帝永嘉六年七月熒惑歲星太白聚牛女之間徘徊
進退按占曰牛女揚州分是後兩都傾覆而元帝中興
揚土

元帝建武元年五月癸未太白熒惑合於東井占曰金
火合曰爍為喪是時愍帝蒙塵於平陽七月崩於寇庭
太興二年七月甲午歲星熒惑會於東井八月乙未

太白犯歲星合於翼占曰為兵饑 三年六月丙辰太白與歲星合於房占同上永昌元年王敦攻京師六軍敗績王敦尋死

成帝咸康三年十一月乙丑太白犯歲星於營室占曰為兵饑四年二月石季龍破幽州遷萬餘家以南五年季龍衆五萬寇沔南略七千餘家而去又騎二萬圍陷邾城殺略五千餘人 四年十二月癸丑太白犯鎮星在箕占曰王者亡地七年慕容皝自稱燕王 七年三

月太白熒惑合於太微中犯左執法明年顯宗崩八年十二月己酉太白犯熒惑於胃占曰大兵起其後庾翼大發兵謀伐石季龍專制上流

康帝建元元年八月丁未太白犯歲星在軫占曰有大兵是年石季龍將劉寧寇沒狄道

穆帝永和四年五月熒惑入婁犯鎮星占曰兵大起有喪災在趙其年石季龍死來年冉閔殺石遵及諸胡十萬餘人其後褚裒北伐喪衆而薨六年三月戊戌熒

惑犯歲星占曰為戰 七年三月戊子歲星熒惑合於奎其年劉顯殺石祗及諸胡帥中土大亂 十二年七月丁卯太白犯鎮星在柳占曰周地有大兵其年八月桓溫伐苻健退因破姚襄於伊水定周地 升平二年八月戊午熒惑犯鎮星在張占曰兵大起 三年八月庚午太白犯鎮星在太微中占曰王者惡之 五年十月丁卯熒惑犯歲星在營室占曰大臣有匿謀一曰衛地有兵時桓溫擅權謀移晉室

海西公太和元年八月戊午太白犯歲在太微中三年六月甲寅太白掩熒惑在太微端門中六年海西公廢

簡文咸安二年正月己酉歲星犯鎮星在須女占曰為內亂七月帝崩桓溫擅權謀殺侍中王坦之等內亂之應

孝武寧康二年十一月癸酉太白掩熒惑在營室占曰金火合為爍為兵喪太元元年七月苻堅伐涼州破之

虜張天錫 太元十年十二月己丑太白犯歲星占曰
為兵饑是時河朔未平兵連在外冬大饑 十七年九
月丁丑歲星熒惑鎮星同在亢氏十二月癸酉鎮星去
熒惑歲星猶合占曰三星合是謂驚立絕行内外有兵
喪與饑改立王公 十九年十月太白鎮星熒惑辰星
合於氐十二月癸丑太白犯歲星在斗占曰為亂饑為
内兵斗吳越分至隆安元年王恭等舉兵顯王國寶之
罪朝廷殺之是後連歲水旱饑

安帝隆安元年二月歲星熒惑皆入羽林占曰中軍兵起四月王恭等舉兵內外戒嚴元興元年八月庚子太白犯歲星在上將東南占曰楚兵饑一曰災在上將二年桓元篡位劉裕盡誅桓氏二年十月丁丑太白犯鎮星在婁占同上三年二月壬辰太白熒惑合於羽林劉裕起義兵桓元逼帝東下義熙二年十二月丁未熒惑太白皆入羽林又合於壁三年正月慕容超寇淮北徐州至下邳八月遣劉敬宣伐蜀三年二月

癸亥熒惑鎮星太白辰星聚於奎婁從鎮星也徐州分
是時慕容超僭號於齊兵連徐兗連歲寇抄至於淮泗
姚興譙縱僭號秦蜀盧循及魏南北交侵其五年劉裕
北殄慕容超其六月辛卯熒惑犯辰星在翼占曰天下
兵起八月己卯太白掩熒惑占曰有大兵其四年姚略
遣衆征赫連勃勃大為所破 五年四月甲戌熒惑犯
辰星在東井占曰皆為兵十二月辛丑太白犯歲星在
奎占曰大兵起魯有兵是年四月劉裕討慕容超六年

二月滅慕容超於魯地 七年七月丁卯歲星犯鎮星
在參占曰歲鎮合為內亂一曰益州戰不勝亡地是時
朱齡石伐蜀後竟滅之明年誅謝混劉毅 八年十月
甲申太白犯鎮星在東井占曰秦有大兵 九年二月
庚午熒惑鎮星皆犯東井占曰秦有兵三月壬辰歲星
熒惑鎮星太白聚於東井從歲星也東井秦分十三年
劉裕定關中其後遂移晉祚 十四年十月癸巳熒惑
入太微犯西蕃上將仍順行至左掖門內留二十日乃

逆行至恭帝元熙元年三月五日出西蕃上將西三尺許
又順還入太微時鎮星在太微熒惑繞鎮星成鉤已其
年四月庚戌從端門出占曰熒惑與鎮星鉤已天庭天
下更紀十二月安帝母弟瑯琊王踐阼是曰恭帝來年
禪於宋

宋文帝元嘉二十三年二月金火水合於東井

梁武帝普通七年正月癸卯太白歲星在牛相犯占曰
其國君凶易政明年三月改元大赦

陳武帝永定三年六月庚子鎮星在鉞與太白并占太白與鎮合為疾為內兵

文帝天嘉五年四月庚子太白歲星合在奎金在南木在北相去二尺許壬寅太白歲星合在婁相去一尺許六年正月己亥太白犯熒惑相去二寸占曰其野有兵喪改立侯王九月乙巳太白又犯熒惑明年帝崩少帝廢

廢帝光大元年八月壬午鎮星辰星合於軫九月戊午

辰星太白相犯占曰改立侯王 二年九月庚戌太白逆行與鎮星合在角占曰為白衣之會又曰所合之國為亡地為疾兵十二月廢帝為臨海王太建二年薨

宣帝太建十一年四月己丑歲星太白辰星合於東井十三年十二月癸酉辰星在太白白上甲戌辰星太白交相掩占曰大兵在野大戰

魏道武天賜四年二月癸亥金水土聚

節閔帝普泰元年十月歲星熒惑鎮星太白聚於紫參

色甚明大占曰當有王者興其月齊高祖起於信都至
中興二年破爾朱兆開霸業

齊文宣天保十年六月庚子鎮星犯井鉞與太白并占
曰子為元枵齊之分野君有戮死者大臣誅鎖斧用其
明年常山王誅楊愔等廢少帝

武成河清四年正月己亥太白犯熒惑相去二寸在奎
甲辰太白熒惑歲星合在婁占曰甲為齊三星若合是
謂驚立絕行其分有兵喪改立侯王

後主武平三年八月癸未鎮星歲星太白合於氐宋之分野占曰其國有內外喪改立侯王四月陳將吳明徹寇彭城右僕射崔季舒等諫帝不宜北幸并州帝怒並誅之内外兵喪之應

周武帝保定二年十一月壬午熒惑犯歲星於危南

五年太白熒惑歲星合於婁 天和二年五月己丑歲

星與熒惑合在井宿相去五尺井為秦分占曰其國有兵為饑旱大臣匿謀下有反者若亡地閏六月丁酉歲

星太白合在柳相去一尺七寸柳為周分占曰為內兵
又曰主人凶憂失城是歲陳湘州刺史華皎率眾來附
遣兵援之因而南伐衛公直與陳將戰於沌口王師失
利遂沒陳 天和六年六月庚辰熒惑太白合在張宿
相去一尺占曰主人兵不勝所合國有殃 建德元年
三月丙辰熒惑太白合於壁占曰其分有兵喪不可舉
事用兵必受殃改立侯王其月誅晉公護等及其黨詔
以齊公憲為大冢宰七月丙午辰與太白合於井相去

七寸占曰其下之國必以重德致天下後半年平齊致天下之應 二年十一月壬子太白掩鎮星在尾占曰鎮星為女主尾為後宮明年皇太后崩 三年十一月丙子歲星與太白相犯光芒相及在危占曰其野兵人主凶失其城邑 宣政元年六月壬午癸丑木火金三星合在井占曰其國霸又曰内外有兵喪改立王侯七月丙辰熒惑太白合於七星相去二尺八寸占曰君憂又曰其國有兵改立王侯有德興無德亡後一年改置

四輔官傳位太子改立王侯之應也

宣帝大象元年四月戊子太白歲星辰星合在井占曰
是謂驚立是謂絕行其内外有兵喪改立侯王其五月
趙陳越代滕五王並入國後二年隋受命宇文氏宗族
相繼誅滅十月乙酉熒惑在虛與鎮星合占曰兵大起
將軍為亂大人惡之是月相州段德舉謀反伏誅明年
杞公宇文亮舉兵反擒殺之 二年七月壬子歲星太
白合於張九月甲申熒惑歲星合於翼

唐高祖武德元年七月丙午鎮星太白辰星聚於東井
關中分也 二年三月丙申鎮星太白辰星復聚於東
井 九年六月己卯歲星辰星合於東井占曰為變謀
太宗貞觀十八年五月太白辰星合於東井占曰為兵
謀 十九年六月丙辰太宗征高麗次安市城太白辰
星合於東井史記曰太白為主辰星為客為蠻夷出相
從而兵在野為戰

高宗永徽元年七月辛酉歲星太白合於柳在秦分占

曰兵起

中宗景龍元年十月丙寅太白熒惑合於虛危占曰有喪

睿宗景雲二年七月鎮星太白合於張占曰內兵太極元年四月熒惑太白合於東井

元宗天寶九載八月五星聚於尾箕熒惑先至而又先去尾箕燕分也占曰有德則慶無德則殃十四載二月熒惑太白鬪於畢昴井鬼間至四月乃伏十五載

五月熒惑鎮星同在虛危中天芒角大動搖占者以為北方之宿子午相衝災在南方

肅宗至德二載四月壬寅歲星熒惑太白辰星聚於鶉首從歲星也罰星先去而歲星留占曰歲星熒惑為陽太白辰星為陰陰主外邦陽主中邦陽與陰合中外相連以兵八月太白芒怒掩歲於鶉火又晝見經天鶉火周分也 乾元元年四月熒惑鎮星太白聚於營室太史南宮沛奏其地戰不勝衛分也

代宗大歷三年七月壬申五星並出東方占曰中國利
八年閏十一月壬寅太白辰星合於危齊分也 十
年正月甲寅歲星熒惑合於南斗占曰饑旱吳越分也
一曰不可用兵七月庚辰太白辰星合於柳京師分也
德宗建中二年六月熒惑太白鬪於東井 四年六月
熒惑太白復鬪於東井京師分也金火罰星鬪者戰象
也 興元元年春熒惑守歲星在角亢占曰有反臣角
亢鄭地 貞元四年五月乙亥歲星熒惑鎮星聚於營

室占曰其國亡地在衛分 六年閏三月庚申太白辰星合於東井占曰為兵憂戊寅熒惑犯鎮星在奎魯分也

憲宗元和九年十月辛未熒惑犯鎮星又與太白合於女在齊分 十年六月辛未歲星熒惑太白辰星合於東井占曰中外相連以兵 十一年五月丁卯歲星辰星合於東井六月己未復合於東井占曰為變謀而更事十一月戊子鎮星熒惑合於虛危十二月鎮星太白

辰星聚於危皆齊分也 十四年八月丁丑歲星太白
辰星聚於軫占曰兵喪在楚分與南方夷貊之國 十
五年三月鎮星太白合於奎占曰內兵徐州分也十二
月熒惑鎮星合於奎占曰主憂

穆宗長慶二年二月甲戌歲星熒惑合於南斗占曰饑
旱八月丙寅熒惑犯鎮星在昴畢因留相守占曰主憂
四年八月庚辰熒惑犯鎮星於東井鎮星既失行犯
鉞而熒惑復往犯之占曰內亂

敬宗寶歷二年八月丁未熒惑鎮星復合於東井與鬼間

文宗太和二年九月歲星熒惑鎮星聚於七星 三年
四月壬申歲星犯鎮星占曰饑 四年五月丙午歲星
太白合於東井 六年正月太白熒惑合於羽林十月
太白熒惑鎮星聚於軫 八年七月庚寅太白熒惑合
相犯推歷度在翼近太微占曰兵起 開成三年六月
丁亥太白犯熒惑於張占曰喪 四年正月丁巳熒惑

太白辰星聚於南斗推歷度在燕分占曰內外兵喪改
立王公冬歲星熒惑俱逆行失色合於東井京師分也
武宗會昌二年六月乙丑熒惑犯歲星於翼占曰旱
四年十月癸未太白熒惑合於南斗咸通中熒惑鎮
星太白辰星聚於畢昂在趙魏之分詔鎮州王景崇被
袞冕軍府稱臣以厭之

僖宗文德元年八月歲星鎮星太白聚於張周分也占
曰內外有兵為河內河東地

昭宗光化三年十月太白鎮星合於南斗占曰吳越有兵

後唐莊宗同光二年八月甲申歲星熒惑合在翼十四度 三年九月丙辰太白歲星相犯

明宗天成二年正月甲戌熒惑歲星相犯 三年春正月壬申金火合於奎九月庚辰鎮星歲星合於箕辛巳太白熒惑合於軫十二月壬寅金木相犯於斗

晉出帝開運元年十二月癸丑太白犯辰

漢高祖天福十二年六月鎮星太白歲星熒惑聚於張
占者云有帝王興於周者高祖起義自平陽趨洛以應
之及隱帝將嗣位又封周王暨周太祖登位以姬姓之
後復繼宗周天人之符乃有所屬

隱帝乾祐二年九月庚戌太白犯鎮丁卯太白犯歲鎮
自元年八月己丑入太微垣犯上將執法內屏謁者鉤
已往來至是歲十一月辛亥而出

凡四百四十三日

十一月辛

酉太白犯木

周太祖廣順元年十一月辰星歲星合宿於尾幽燕之分占其地合有變兼主饑饉疾疫

宋太祖建隆三年十一月壬申歲星熒惑合於房 乾

德四年六月己亥太白熒惑合於張 五年三月五星

如連珠聚於奎當魯分從鎮星晨見東方占曰有德受

慶大人奄有四方子孫蕃昌從鎮星王者以重致天下

重福明年真宗降誕 六年正月壬寅歲星鎮星太白

合於婁 開寶三年五月庚戌太白鎮星合於畢相去

二寸許六月乙未太白歲星合於東井相去四寸許
五年十月甲辰太白熒惑合於牽牛

太宗雍熙二年七月丙戌熒惑歲星合於軫 三年五
月丙戌熒惑太白合於畢 四年十二月丁巳太白鎮
星歲星合於南斗魁 端拱二年九月乙巳鎮星熒惑
合於南斗相去尺餘十一月壬辰歲星熒惑合於危

淳化二年正月癸丑鎮星太白合於須女三月癸丑太
白歲星合於婁太白在歲星南 三年正月丙辰太白

熒惑合於婁歲星在胃日官鄭昭晏言測金火行度合
相犯今火行而南金稍北有若相避 五年六月丙午
歲星太白合於柳相去三寸許 至道元年五月庚戌
歲星太白太陰同度不相犯乙卯鎮星熒惑合於東壁
相去七寸許丙辰太白歲星合於七星不相犯

真宗景德三年七月己酉辰星歲星太白合於柳 四
年七月五星當聚鶉火既而近太陽同時伏占曰猶臣
避君之明九月戊子歲星合於翼 大中祥符元年九

月乙酉太白歲星合於角亢占在兗州之野其年東封
泰山十月庚寅五星順行同色 六年正月癸巳五星
順行五色占曰天下兵偃 天禧二年八月癸丑歲星
熒惑合於張占曰東宮大慶其年仁宗升儲

仁宗天聖元年三月丁丑火犯木占曰天下受福 二

年九月戊申金犯火 三年五月癸巳金水相犯於井

五年六月辛卯火犯土壬辰掩土 七年五月辛未

金犯土在畢宿一度半 八年六月乙酉金犯火 景

祐元年閏六月庚辰金犯土 二年五月丁亥又犯土
九月辛巳火犯土相去二寸許在張六度 三年五月
丁亥日官言太歲及歲星在北方宜飭備邊 四年九
月辛亥火犯土在翼十五度 康定元年九月壬申水
犯土 慶歷三年九月甲申金犯木 皇祐三年十一
月丁丑火犯土 至和三年九月乙巳金犯木 嘉祐
三年閏十二月甲戌火犯木躔斗四度占曰有子孫喜
燕分有兵 五年正月壬辰金犯木占曰為戰陣大將

有憂宜飭兵備 六年三月癸巳火又犯木在營室占
曰衛地有兵又為赦令七月己丑金犯土躔井十二度
占曰秦分兵饑 七年正月庚申又犯木占曰為饑為
兵營室衛分六月丁丑又犯火在翼一度半占曰內有
盜臣又為兵事翼楚分也 八年四月己丑又犯木在
胃占曰趙分兵饑是日熒惑晨見東方先是自七年八
月庚辰夕伏積二百四十九日祈禳於集英殿其日始
見五月庚申火犯木在昴四度占曰子孫之福又宜察

趙分兵謀之事 慶歷三年十一月壬辰五星皆在東方占曰中國安寧

英宗治平元年十一月庚午水犯金在尾十六度占曰辰星與太白合為陰謀為兵憂在燕趙分 二年四月丁巳金犯木占曰為兵饑亦主后妃有憂戊子金犯土在張五度占曰太子不安周分有兵八月己亥火犯木躔柳七度半占曰秦分有兵謀亦為赦令十月丙申又犯土在翼二度占曰南楚之分兵起 三年十二月癸

卯金犯火躔危四度占曰有兵謀事

神宗治平四年九月癸巳太白犯鎮主兵或饑十月甲子熒惑犯鎮主兵大起十一月乙卯又犯歲主赦及天下受福 熙寧元年十一月己丑太白犯熒惑主兵客敗主勝或防逆謀 三年正月己未熒惑犯歲主赦或

子孫喜十月乙酉太白犯鎮主有兵 八年三月庚寅又犯鎮主燕分兵 十年七月癸酉又犯歲主秦分饑元豐二年五月庚寅熒惑犯歲主兵 四年十月乙

亥又犯太白主兵 五年三月丙戌太白犯鎮主兵戰
女主災十二月丙寅辰犯歲主兵 七年十一月甲寅
太白犯歲主大將凶

哲宗元祐元年閏二月戊申八年四月乙卯太白犯熒
惑皆主兵起 紹聖元年閏四月庚午熒惑犯鎮主兵
起及後宮宜崇福 三年九月丙午太白犯鎮主楚分
有兵 元符元年十二月乙未太白犯熒惑主大兵西
國敗 二年十月乙巳太白犯鎮主鄭分饑及後宮憂

十二月辛亥熒惑犯鎮主兵起及後宮

徽宗崇寧三年四月丙辰熒惑犯鎮主兵起大戰又曰
女子當之十一月庚寅太白犯辰主國不安先起兵者
凶 大觀元年十二月乙酉太白犯熒惑主君病太子
憂 二年正月甲寅太白犯歲主大戰民饑王者有賊
十月丁酉太白犯鎮主太子不安十一月壬申太白犯
歲主大戰民饑王者有賊 三年三月辛未太白犯歲
四年二月辛巳太白犯歲占同五月甲辰熒惑犯歲

主兵大起冊太子有赦 政和元年二月辛丑太白犯
鎮主兵饑太子不安十二月乙未太白犯鎮占同 三
年七月乙丑熒惑犯太白主君亡天下兵起 四年十
月甲子熒惑犯歲主兵起冊太子有赦 七年正月癸
卯熒惑犯歲占同 宣和二年十月己卯太白犯熒惑
主君亡天下兵起 三年閏五月壬午熒惑犯歲主兵
起冊太子有赦 七年七月乙未太白犯歲主王者有
賊大戰民饑

欽宗靖康元年六月辛丑太白犯歲占同六月丙辰土火金木聚主大盪其下兵喪並起君子憂小人流

高宗建炎四年六月戊子熒惑與鎮合於亢占主兵喪
旱是歲敵再犯淮立偽齊江湖羣盜大起鄭后計至次
年隆祐太后崩十一月辛丑太白歲星合於南斗占為
戰大將死又西方凶於是張浚以五路之師敗於富平
誅趙哲自秦州退軍興州次年陝西皆陷 紹興元年
十一月乙卯太白與鎮星合 四年三月乙亥辰星與

太白合於畢占為兵憂又曰西方有兵不戰是秋岳飛
敗敵於襄鄧張憲破之於唐州襄漢悉平 五年正月
乙卯太白鎮合於南斗閏二月丙午熒惑歲星合於昴
占為內亂臣有謀為旱為饑北軍困是歲亢旱 七年
四月丁巳金火合於東井占為爍為喪其下之國不可
舉事用兵又曰大人憂主兵不勝有破軍殺將又曰有
兵兵罷國安於是王倫歸敵許和又許還河南諸州五
月乙亥水金火三星合於井占是謂驚立絕行有兵喪

民饑是年劉豫為金人所廢甲申火木金合於柳戊子
水火金木合於柳占謂大盪有兵喪君子憂小人流閏
十月丁卯火水合於氐占為北軍用兵舉事大敗九
年三月癸卯金火合於井度占為爍為喪其下之國不
可舉兵又曰有破死將於是金人入東京河南陝西相
繼陷九月丁未水木合於角庚申金木合於角占大將
死十月壬申金木合於氐占同次年岳飛死於獄十
年十一月丁未金土合於危占為疾為內兵十二月戊

子土金合於室 十一年三月庚子朔土金復合於室
十七年五月乙丑木與金合占大將死白衣會 十
九年六月壬戌金星行犯土星占太子不安憂於是秦
檜動搖皇子七月丁未金木水合於張占其分國內外
有兵災民饑改立王侯是歲完顏亮弑其主亶而自立
二十八年十月乙未水星順行犯土星占夏寒雨雪
妨女后閏六月己巳火星犯木星占冊太子當有赦明
年始正皇子名

孝宗隆興元年七月壬寅熒惑辰星合於柳占周分赤地千里又為饑有覆軍殺將在秋為兵或大旱是年有宿離之敗 乾道四年二月壬子水金合於胃占為變謀為兵憂同夜昏度瞻見金土晨度瞻見木火水是為水金火土木星俱見占五星並見其年必惡八月己亥水金火土木五星又俱見 六年五月乙亥五星俱見七月乙巳火星犯木在畢占冊太子當有赦次年立恭王惇為皇太子十月庚申五星俱見 八年十月癸卯

五星見 九年三月辛丑火木合於柳四月乙丑火木
合於星占皆云為內亂臣有謀又云當其野旱以饑亡
是歲浙東江東西湖北諸州旱 淳熙十三年閏七月
戊午夜五星皆夕伏至戊辰五星伏聚在軫又至八月
乙亥日月五星俱聚軫占謂易行有德受慶亡德受殃
光宗紹熙四年三月辛巳水星與金星會於昴宿內占
為兵起為變謀

寧宗慶元元年四月辛酉木金合於井占為白衣會將

相死六月庚午金木合於井占西方凶又歲星所在太白從之伐者利 三年八月甲戌金火木三星合於翼占三星合是謂驚立絕行其分國內外有兵喪兵饑改立王侯後二年光宗上僊 四年八月甲戌火與土合於虛占為兵亂旱喪 五年八月辛丑火星犯木星占冊太子當有赦 六年四月癸巳火土合於室及火犯土星占為憂主孽卿會大人惡之又曰女子當之於是慈懿皇后李氏光宗皇帝相繼崩 嘉泰二年正月丁

己金火水合於南斗占三星合為驚立絕行於是金國
盜起邊釁始開五月庚戌火星順行犯土星占大戰
開禧二年二月壬申金木土三星合於昴宿占其分國
内外有兵喪民饑改立王侯



文獻通考卷二百九十三下